



A-N-T-I

ALIANSA NASIONAL TIMÓR-LESTE BA TRIBUNÁL INTERNASIONAL
Sekretariadu FONGTIL, diresaun Kontaktu, 7289241, 7266564
atino@laohamutuk.org lanarra.del@gmail.com

Deklarasaun Konjunta

**Komemorasaun Tinan XIII Loron Masakre Liquiça 5-6 Abril tinan 1999 – 2012:
“Vítima nia direitu ba Justisa Ignoradu husi Estadu Timór Lésté, Indonézia no Komunitade
Internasionál (ONU), Ami Hein Justisa la’os Amnestia!”**

Masakre Liquiça ne’ebé halo husi Milisia Besi Merah Putih (BMP) no involve Brimob no TNI, ho Sistemátiku ohin kompleta tinan sanulu resin tolu. Akontesimentu ne’e rezulta ema barak mate, kanek, hetan tortura, balun lakon no estraga mós uma kreda ne’ebé mak povu sira subar ba.

Akontesimentu ne’e, kuaze hanesan iha fatin hotu iha teritóriu Timór Leste laran tomak antes no depois konsulta Populár tinan 1999. Asaun brutalismu no kruel husi Milisia BMP, Brimob no TNI, halo ema sivíl barak moris ho tauk no trauma liu-liu feto, labarik no populasaun bai-bain sira.

To’o ohin loron, ema ne’ebé mate no lakon ho forsada iha masakre Liquiça no masakre sira seluk, ONU no estadu Indonézia husik sira nia responsabilidade. Estadu Indonézia tenki simu responsabilidade ba aktus violasaun hotu tanbá ONU fo fiar ba Estadu Indonézia hodi aseguira siguransa iha teritóriu Timór Leste laran tomak durante prosesu konsultasaun Populár. Ohin, tinan sanulu resin tolu masakre Liquiça, maibé seidak iha prosesu Justisa ida ne’ebé kredivel no justu hodi fo lia los ba Povu Timór Leste, Vítima no família Vítima sira.

ONU foti ona pasu pozitivu balun atu responde ba asuntu justisa ba krime grave durante dekada ida liu ona, atraves husi estabesementu Unidade Crime Sériu (SCU), atu investiga no prosesa krime sira ne’ebé akontese durante períodu okupasaun Indonezia nian iha Timor, hodi nune’e bele husu responsabilidade ba autór kriminozu ne’ebé mak komete krime violasaun direitu umanus iha tinan 1999. Aleinde ne’e, Espesial Panel atu julga autór komete krime sériu no Komisaun Peritus atu reporta ba efetividade ba servisu judisial inklui Tribunál Ad-Hoc iha Jakarta.

Maibé asaun sira ne’e la kontinua husi Konsellu Seguransa, aleinde ne’e SCU no SP sira nia mandatu atu investiga deit ba kazu sira ne’ebé akontese iha tinan 1999 hodi exklue tiha 99% homisidiu ne’ebé halo entre tinan 1975 no 1998.

Iha parte seluk, ONU nia representante iha Timór Leste koalia bebeik katak ONU la tolera 'Impunidade' atu prevalese maibé la hahu ho mekanismu ne'ebé efetivu ruma hodi hetan buat ne'ebé sira koalia hodi hala'o prosesu julgamentu ba kriminozu barak ne'ebé to'o ohin loron moris livre no hetan protesau husi Governu Indoneisa rasik. Estadu Timór Leste mós to'o agora seidauk hakarak koalia konabá kazu krime pasadu sira maibé preokupa liu relasaun diplomátiku ho Indonézia.

Tanba kompremiu polítika ne'ebé estadu rua (Timór no Indonézia) halo hodi Ignora Justisa no Akuntabilidade ba Vítima no povu Timór Leste.

Ho realidade ne'ebé akontese maka, Povu, Organizasaun vítima, família vítima, aktivista direitos humanus, Estudante, NGO no grupu solidariedade Internasionál ne'ebé hamahan an iha ANTI (Aliansi Nasionál ba Tribunál Internasionál) reafirma ami nia pozisaun hodi ezije nafatin JUSTISA no Tribunál Internasionál:

1. Ami ezije ba comunidade Internasionál liu – liu ba ONU atu implementa relatóriu husi CAVR, KPP - Ham Indonézia, Komisaun peritus ONU nia ne'ebé rekomena tribunál internasionál tanbá prosesu julgamentu husi ONU iha Timór Leste no Indonézia iha Tribunál Ad - Hoc faila atu julga kriminozu kontra umanidade no bele hakotu korente Impunidade iha Timór Leste no Indonézia.
2. ANTI rejeita totalmente deklarasaun ka pedidu husi Prezidente República Sua Exelénsia DR. Jose Ramós Horta nian ne'ebé pública iha Jornál STL data 29 Marsu 2012, hodi husu ba Parlamentu Nasionál atu halo lalais Lei Amnestia ida hodi taka ka haluha tiha kazu krime sira ne'ebé akontese durante 1974 to'o iha 1999. Tanbá pedidu ne'e rasik kontra Konstituisaun RDTL artigu 160 ne'ebé koalia konabá kazu krime bot sira nia prosedimentu bele hala'o iha Tribunál Nasionál no Internasionál, nune'e mós intensaun husi pedidu ne'e la fo sentidu hodi desvaloriza relatóriu CAVR no nia rekomendasaun Chega!, tanbá ne'e ANTI konsidera Pedidu Amnestia nu'udár asaun Estadu hodi INSULTA no aumenta tan sofrémentu vítima sira nian ne'ebé too agora hein hela justisa.
3. Husu ba Lideransa Polítiku Timór Leste nian atu suporta ativu prosesu luta ba justisa no akuntabilidade hodi fo fatin ba prosesa krime pasadu sira 1975 to'o iha 1999, nune'e bele asegura hakotu korente impunidade no hodi hatudu respeita husi Lideransa Polítiku sira ba Lei ne'ebé vigora iha ita nia rai doben Nasaun foun ida ne'e.
4. Husu ba Estatu Timór Leste atu regulariza komemorasaun ba masakre sira ne'ebe akontese iha rai ida ne'e, hanesan masakre Igreja Liquiça no masakre iha Teritóriu Timór ne'ebé mak ohin loron ita hotu goza liberdade ba ukun rasik an, ho rekoñesimentu no komemorasaun sira ba iha loron bo'ot no fatin masakre sira atu fo hanoin hikas fali istória nakukun ne'ebé Povu Timór Leste hakat husi luta naruk to'o ba ukun rasik an. Hodi nune'e bele fo onra no tane ass vítima sira nia digindade no direitu hanesan umanu.

5. Husu Estadu Timór Leste no Indonézia atu buka ema ne'ebé lakon forsadamente no ratifika Konvensaun Intenasionál konabá protesausn ema hotu husi halakon forsadamente nune'e bele asegura atu labele akontese tan ema lakon forsada iha tempu oin mai.
Dili, 10 fulan Abril 2012

Oganizasaun no Individu ne'ebé asina dokumentu ne'e:

1. **ASOSIASAUN VÍTIMA**
2. **La'ó Hamutuk**
3. **HAK (Asosiasaun HAK)**
4. **JSMP (Judicial System Monitoring Program)**
5. **FONGTIL**
6. **Fokupers**
7. **FTM**
8. **CDI**
9. **MDI**
10. **ICTJ**
11. **Komisaun Justisa e Pas**
12. **STP – CAVR**
13. **KSI**
14. **KUP – UNDIL**
15. **Komite 12 Novembru**
16. **Front Mahasiswa Timor-Leste**